

<><><><><><>

Headlines

- राष्ट्रपति, उपराष्ट्रपति ते प्रधानमंत्री होरें साबका प्रधानमंत्री सुरगवासी डाक्टर मनमोहन सिंह होरें गी श्रद्धांजलि अर्पित कीती।
- उपमुख्यमंत्री सुरिंदर चौधरी होरें रजौरी दे सद्दा इलाके च आम लोकें तगर पुज्ज बनाने आह्ला इक कैंप लाया। महत्वपूर्ण ढांचागत परियोजना लेई नींह पत्थर बी रक्खेआ।
- ग्रामीण विकास मंत्री जावेद अहमद डार होरें प्रधानमंत्री आवास योजना ग्रामीण दी कामयाबी पर लोऽ पाई। जम्मू-कश्मीर च इस योजना तैह्त्त 2 लक्ख 80 ज्हार शा मते मकानें दा कम्म सबूरा।
- इक्क मैगावाट दी समर्थ आह्ला सौर उर्जा प्लांट खडेरने कन्नै कटड़ा रेलवे स्टेशन नै स्वच्छ उर्जा दे मामले च महत्वपूर्ण उपलब्धि हासल कीती ऐ।
- 5 जम्मू दे पदरे इलाकें च बरखा ते उच्चिएं धारें पर बर्फबारी कारण सीत होर बधी गेआ ऐ।

<><><><><><>

Tributes-Manmohan

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें साबका प्रधानमंत्री डॉ. मनमोहन सिंह हुंदे घर जाइयै उनेंगी श्रद्धांजलि भेंट कीती। एहदे मगरा प्रधानमंत्री नरेंद्र मोदी होरें इक वीडियो स्नेह च साबका प्रधानमंत्री डॉ. मनमोहन सिंह हुंदा काल होई जाने पर अफसोस जाहिर कीता। उनें आखेआ जे मनमोहन सिंह हुंदा जीवन औने आहिलयें पीढ़ियें लेई मिसाल ऐ जे कियां परेशानियें थमां उप्पर उठिये नमियां उंचाइयां हासल कीतियां जाई सकदियां न। उनें अग्रे आखेआ जे मनमोहन सिंह होरें गी इक ईमानदारी व्यक्ति ते उच्चे दर्जे दे अर्थशास्त्री दे तौर पर चेत्ता कीता जाग। उनें एहू बी आखेआ जे प्रधानमंत्री पी.वी नरसिम्हा राव हुंदे मंत्रीमंडल च डॉ. सिंह होर वित्त मंत्री हे ते उनें इस बेल्ले दे 1991 आहली आर्थिक संकट दौरान माली ते आर्थिक खेत्तर च नमैं सुधारें लेई महत्वपूर्ण भूमिका निभाई ही। इस बारै च प्रधानमंत्री नरेंद्र मोदी होरें आखेआ।

तोआई, केंद्री मंत्री अमित शाह, जे.पी नड्डा, राजनाथ सिंह, ज्योतिरादित्य सिंधिया, कांग्रेस नेता सोनिया गांधी, लोकसभा च विपक्ष दे नेता राहुल गांधी, कांग्रेस अध्यक्ष मल्लिकार्जुन खड़गे ते होर दुए नेताएं बी डॉ. मनमोहन सिंह हुंदे घर जाइयै उनेंगी पुष्पांजलि भेंट कीती। साबका प्रधानमंत्री डॉ. मनमोहन सिंह हुंदा अंतिम संस्कार कल सांठे 9 बजे होग। इक सोशल मीडिया पोस्ट च कांग्रेस दे महासचिव के.सी वेणुगोपाल होरें जानकारी दिती जे डॉ. सिंह हुंदी अंतिम जात्तरा कल बडुलै कांग्रेस मुख्यालय थमां शुरू होग ते श्मशान घाट तगर जाग। कल बडुलै पार्टी कार्यकर्ताएं ते लोक साबका प्रधानमंत्री होरें गी श्रद्धांजलि देई सकदे न।

<><><><><><>

National Mourning

सरकारै साबका प्रधानमंत्री डॉ. मनमोहन सिंह हुंदे काल मगरा उंदे सम्मान च 7 दिनें दे सरकारी सोग दी घोषणा कीती ऐ। डॉ. मनमोहन सिंह हुंदा खीरी संस्कार पूरे राजकीय सम्मान कन्नै कीता जाहगा। इस दौरान मुख्य भरै च राष्ट्री झंडा अद्दा झुके दा रौहगा ते कोई बी सरकारी मनोरंजन आह्ला कार्यक्रम आयोजित नेई होग। विदेशें च स्थित सारे भारती मिशनें ते दूतावासें च बी खीरी संस्कार आहले ध्याड़े राष्ट्री झंडा अद्दा झुके दा रौहगा। साबका प्रधानमंत्री डॉ. मनमोहन सिंह होरें'गी श्रद्धांजलि भेंट करने लेई अज्ज दिनें 11 बजे केंद्री मंत्रीमंडल दी बैठक बी लगगी।

<><><><><><>

Dy.CM

उपमुख्यमंत्री सुरेंद्र चौधरी होरें राजौरी जिले दे ब्लॉक ख्वास दे सड्डा इलाके च इक जन आउटरीच कैंप दा सरिस्ता कीता जित्थे उनें मकामी लोकें कन्नै गल्लबात कीती ते उंदी मंगें ते शकैतें बारै सुनेआ। इस मौके पर लोकें उन्दे अगगे शिड़कें दे निर्माण बरै ते हाई स्कूल सड्डा गी हायर सैकेंडरी स्कूल च तब्दील करने सने कई होरनें मुद्दे गी पुट्टेआ। डिप्टी सी.एम होरें लोकें गी उंदी शकैतें दा समेंसिर नबेडा करने दा भरोसा दोआया ते दूर-दरेडे इलाकें दे विकास गी यकीनी बनाने लेई सरकार दी प्रतिबद्धता गी फही पक्का कीता। दौरे दौरान डिप्टी सी.एम सुरेंद्र चौधरी होरें सड्डा नाला पर मंगरोट थाहर 45 मीटर लम्मा पुल बनाने लेई नीं पत्थर बी रक्खेआ। इस परियोजना च तकरीबन 5 करोड़ 200 लक्ख रपे दी लागत औने दा अंदाजा ऐ।

<><><><><><>

CS Meeting

मुख्य सचिव अटल डुल्लु होरें जम्मू दे सिद्धडा इलाके च तवी नदी कश वाटर थीम पार्क स्थापित करने सरबंधी बक्ख-बक्ख तौर-तरीकें बारै चर्चा करने लेई अज्ज इक बैठक लाई। इस मौके उनें तवी नदी दे कंडू सिद्धडा गोल्फ कोर्स दे नेडे सरबंधत मैहकमे आसेआ शिनाख्त कीती गेदी जिमीं दी स्थिति बारै जानकारी लैती। उनें हाउसिंग विभाग गी आखेआ जे ओहू इस गल्लै गी पक्का करन जे जिमीं हासल करने दे मामले च कोई दिक्कत-परेशानी पेश नेई आवै। उनें जम्मू विकास प्राधिकरण गी आखेआ जे ओहू इस परियोजना च ऐकड़ी जिमीं दा इस्तेमाल इस चाल्ली कन्नै करन तांजे जेडीए लेई नियमित औंदन दा इक जरिया कायम होई जा। उनें सरबंधत अधिकारिणें गी आखेआ जे ओहू योजनाबद्ध तरीके कन्नै सरकारी ते निजी सांझ-भ्याली आहले ढंगै राणें इस जिमीं पर वाटर एम्यूजमेंट पार्क कायम करने लेई सरबंधत धड़ें कोला प्रस्ताऽ मंगन।

<><><><><><>

Outreach-Programme Samba

लेबर कमिशनर चरणदीप सिंह होरें अज्ज साम्बा जिले दा व्यापक दौरा लाया ते मजदूरें दी स्थिति दा मुआयना कीता। इस दौरे दा मकसद औद्योगिक केंद्र च फैक्टरी च कम्म करा'रदे मजदूरें कन्नै सिद्दे तौर पर गल्लबात करना हा। इस दौरे दौरान इक सार्वजनिक दरबार बी लाया गेआ जेदे च फैक्टरी दे मजदूर ते उंदे नुमाइंदें दी सक्रिय भागीदारी दिक्खी गेई। लेबर कमीशनर होरें आखेआ जे स्हाड़ा मुख्य मकसद एहू यकीनी बनाना ऐ जे हर मजदूर

अपने अधिकारें बारै जागरूक होए ते शकैतें दे नबेड़े तगर सखल्ली पुज्ज उपलब्ध होई सकै। स्हाड़े जिला संवाददाता कन्नै गल्ल करदे होई लेबर कमिशनर चरणदीप सिंह होरें आखेआ।

<><><><><><>

Katra Solar Plant

कटड़ा रेलवे स्टेशन पर इक्क मैगावाट दी समर्थ आह्ला सौर उर्जा प्लांट खडेरने कन्नै, टिकाऊ ते स्वच्छ उर्जा आहले हल अपनाने दे मामले च इक संगे-मील हासल होआ ऐ। अक्षय उर्जा गी बढ़ावा देने ते कार्बन उत्सर्जन घट्ट करने दी भारत सरकार दी वचनबद्धता दे मूजब गै एहू पैहलकदमी कीती गेई ऐ। सौर उर्जा आहले इस प्लांट कन्नै कटरा रेलवे स्टेशन दी उर्जा मतल्लक खरी मती जरूरतें गी पूरा कीता जाई सकोग ते एहूदे कन्नै उर्जा दे रिवायती स्रोतें उप्पर निर्भरता ते कार्बन उत्सर्जन बी घट्ट होग। एहू सौर उर्जा प्लांट, भलेआं अज्जै-कल्लै दिएं तकनीकें आहले सोलर पैनलें ते बेहतीन उर्जा प्रबंधन प्रणाली कन्नै लैस ऐ ते मेद ऐ जे एहूदे राहें हर ब'रे अंदाजन कोई 15 लक्ख युनिट बिजली पैदा कीती जाई सकोग। श्री माता वैष्णो देवी स्टेशन कटड़ा दे स्टेशन सुप्रीन्टेण्डेंट जुगल किशोर शर्मा होरें आखेआ जे सूरज दी तपश कन्नै चलने आह्ला एहू संयंत्र, पर्यावरण दी सांभ-संभाल ते उर्जा दे खेत्तर च आत्मनिर्भर बनने दे जतनं गी दर्शांदा ऐ। इस बारै स्हाड़े संवाददाता नै श्री माता वैष्णो देवी स्टेशन कटड़ा दे स्टेशन सुप्रीन्टेण्डेंट जुगल किशोर शर्मा ते इक मुकामी बसनीक राकेश वजीर हुंदे कन्नै खास गल्लबात कीती। उनें आखेआ

<><><><><><>

Dar – PMAY - G

राई-बाई ते ग्रामीण विकास मैहकमें दे मंत्री जावेद अहमद डार होरें प्रधानमंत्री आवास योजना- ग्रामीण दी सराहना करदे होई इसी मुख्य भरै च लक्खां बद्धे लोकें लेई मेद दी इक लोऽ करार दित्ता ऐ जेहूडी उंदे अपने घर दे सुक्खने गी सच करै करदी ऐ। जम्मू दे पंचैत भवन च प्रधानमंत्री आवास योजना - ग्रामीण बारै लोआई गेदी इक ध्याड़े दी कार्यशाला दरान बोलदे होई मंत्री होरें जम्मू-कश्मीर च इस योजना दे शानदार प्रभाऽ पर लोऽ पाई। मैहकमे दे सचिव मोहम्मद ऐजाज़ अस्सद होरें दस्सेआ जे जम्मू-कश्मीर च इस योजना तैहत 3 लक्ख 35 ज्हार शा मते घरें गी मंजूरी दिती गेदी ऐ जिंदे चा 2 लक्ख 80 ज्हार दा कम्म सबूरा करी दित्ता गेदा ऐ जेहूदा मतलब एहू होआ जे कुल 83 फीसद लक्ष्य हासल करी लैता गेदा ऐ। उनें ब'रे 2023-24 दरान 67 ज्हार 780 मकानें दे निर्माण दा लक्ष्य हासल करने लेई मैहकमे दे सराहना कीती। उनें दस्सेआ जे जंदी 24 दिसम्बर तगर बादू 82 ज्हार मकानें दा कम्म सबूरा करी लैता गेआ ऐ।

<><><><><><>

Food Awareness Udhampur

उधमपुर जिले च खाने-पीने आहली सेहतमंद ते सुरक्षित चीजें बारै इस्तेमाल होए दे तेल गी परतियै इस्तेमाल कीते जाने पर रोक ते साफ-सफाई पर केंद्रित इक जागरूकता कार्यक्रम दा सरिस्ता कीता गेआ। इस मौके पर खाद्य सुरक्षा आयुक्त हशमीत अली यत्तू होर मुख् परौहने हे। इस जागरूकता कार्यक्रम च खाद्य कारोबार संचालकें गी इक बारी इस्तेमाल होई गेदे तेल गी परतियै इस्तेमाल करने दे दुरुपयोग ते माड़े असर बारै जागरूक

कीता गेआ। इस मौके पर मती गिनतरी च इस खेत्तर दी महिला उद्यमियें हिस्सा लैता ते नमियें तकनीकें बारै जानकारी हासिल कीती। मौके पर गै जांच करने आहली लैब व्हीकल बी मौके पर ही तां जे लोकें गी इस नमीं तकनीक बारै जानकारी दिती जाई सकै ते खाने आहली चीजें च मिलावट दी जांच कीती जाई सकै। आकाशवाणी कन्नै गल्ल करदे होई खाद्य सुरक्षा सरबन्धी कमिशनर हशमीत अली यत्तू होरें आखेआ।

<><><><><><>

PM Mann Ki Baat

प्रधानमंत्री नरेन्द्र मोदी अपने माहवार रेडियो कार्यक्रम "मन की बात" दे राएं औंदे ऐतवारें 29 दिसम्बर गी देश-विदेश च रौहने आहले श्रोताएं कन्नै बचार सांझे करडन। हर म्हीने दे अखीरले ऐतवारें दिनै 11 बजे प्रसारत होने आले इस कार्यक्रम दी एहू 117मीं किशत होग। मन की बात दा प्रसारण आकाशवाणी ते दूरदर्शन दे समूलचे नेटवर्क पर कीता जाहग। एह्दे इलावा एहू प्रसारण आकाशवाणी खबरें दी वैबसाइट ते न्यूज़ ऑन ए.आई.आर मोबाइल ऐप पर बी उपलब्ध होग। एह्दे कन्नो कन्नी आकाशवाणी समाचार, डी.डी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी एह्दी लाइव स्ट्रीमिंग उपलब्ध होग। आकाशवाणी परा मन की बात दे प्रसारण दे तुरत मगरा मकामी भाशाएं च एह्दा अनुवाद बी प्रसारण कीता जाहग।

<><><><><><>

Weather-Updated

जम्मू खित्ते दे मैदानी इलाकें च अज्ज दपैहरी हल्की बरखा पौने करी मौसम च ठंडू दी लैहर बनी दी ऐ। एह्दे अलावा जम्मू संभाग दे कई हिस्सें च बर्फबारी होई जेदे कन्नै तापमान च होर गिरावट दर्ज कीती गई। इंदे च डोडा, रामबन ते किशतवाड़ जिलें दे किश हिस्से शामिल न। तोआई, दक्खन कश्मीर च बी बक्ख-बक्ख इलाकें च बर्फबारी होई जेदे कन्नै बिजबिहाड़ा, शोपियां, कुलगाम ते पुलवामा दे कई हिस्सें च बर्फू दी चिट्टी चादर कन्नै सैलानी बड़े मते खुश नजर आवा रदे न। मौसम विभाग नै इयै जनेह हालात दी पैहले पूर्वानुमान लाया हा। उआं अधिकारियें लोकें गी आग्रह कीता ऐ जे ओहू उप्परी थाहरें ते बर्फबारी आहली शिडकें पर नेई जान ते एहतियात बरतन।

<><><><><><>